

## GENOTEN 2015 04 10

### Brief van Gradus an z'n bruur in Canada

Beste bruur Bertus,  
In de zowat vieftig jaor dat ik –met wat kōtte onder-  
breakingen- as columnist  
de Achterhoekse politiek  
op de korrel nam hek nog  
npoit zo genoten as ver-  
gangen maonden. 'n Co-  
lumnist is 'n hundje dat



't liefst watert tegen hoge beum. Ik kwam water tekōt. Dat kwam veural umdat de dames en heren politici in Olde Iesselstreek hun uterste best deien um te bewiezen dat politici ook maor gewone mensen zun. Met succes, want in de DRU werd harder gelachen um de optredens in de raodszaal as in de theaterzaal. 't Lek wel 'n kwekeri-j van poedels die heel snel veurbi-j kwamen. Paste in de passieweak: de ene burgemeister was –zat van 't getreiter- weggegaon en effen later was de volgende al weer opgestaon. Hi-j heet Steven de Vreeze en schient nergens bang veur te zun. Toen de Commissaris van de Koning hum vroeg was hi-j in Frankriek as metselaar 'n muurtje an 't metselen. Twee dagen later was hi-j in Gendringen as opperman puun an 't rumen. Ik snap neet dat d-r mensen zun die zoiets vri-jwillig doen. Ik zol toch liever onder de Franse zon zitten dan in 'n Gendrings wespennest. De ni-je burgervader zegt dat old zeer neet zin zeer zal zun. 't Zal hum echter de kommende maonden nog heel wat pien doen. Ook 't ambtenarencorps schient zo ongeveer 't tegenoavergestelde te zun van 'n vriendenclub. Veur de zommervakantie motten d-r wetholders kommen waar zowat iedereen 't met ens is. Dat wudt zuken naor 'n speld in 'n hooiberg. 't Wetholderschap is 'n good betaalde baan met vol aanzien en cascanade. Dan zeggen ze dat ze daor luj veur van buten motten halen. Viel mien op dat alleen de heer Peters van de S.P. daor op androng. Die hebben gin kandidaat. De oaverige parti-jen zaten zo onopvallend meugeluk te lonken naor dit lot uut de lotteri-j. Logisch toch dat ze 'n vremde neet de lekkere kaes van hun brood laoten eaten. Boavendien: A'j uut ow eigen mensen kiest wè'j wà'j hebt (helaas). D-r vilt veur de vakantie nog 'n hoop te genieten.

De groeten an Ans en de blagen van ow bruur  
Gradus Klets